

Uunga siunnersuut:

**Uunga siunnersuut: Nunami inuussutissarsiutinut tunngatillugu
inuussutissarsiornermik siuarsaaneq pillugu Inatsisartut inatsisaata
allanngortinneqarnera pillugu inatsit nr. x ulloq xx. 2021-imeersoq. (Erseqqissaaneq
nipilersornermik inuussutissarsiutinut aamma filmiliornermi inuussutissarsiutinut
tunngatillugu)**

Inuussutissarsiornermut Niuernermullu Naalakkersuisumit saqqummiunneqartoq

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini inuttarai:

Inatsisartunut ilaasortaq Mariane Paviasen, Inuit Ataqatigiit, Siulittaasoq
Inatsisartunut ilaasortaq Lars Poulsen, Siumut, Siulittaasup tullia
Inatsisartunut ilaasortaq Aqqalu Jerimiassen, Atassut
Inatsisartunut ilaasortaq Karl Tobiassen, Siumut
Inatsisartunut ilaasortaq Knud Mathiassen, Inuit Ataqatigiit
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Aslak Wilhelm Jensen, Siumut

UKA2021-mi ulloq 12. oktober siullermeerinninnerup kingorna siunnersuut ataatsimiititaliamit misissorneqarpoq.

Siunnersuutip imarisai siunertaalu

UPA2020-mi immikkoortoq 87-imut allannguutissatut siunnersuutip Inatsisartunit akuersissutigineqarnerata malitsiatut siunnersuut saqqummiunneqarpoq, taanna malillugu ‘Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaannik allanngueqqullugit Naalakkersuisut peqquneqarput¹, taamaalillutik

¹ Nunami inuussutissarsiutinut tunngatillugu inuussutissarsiornermik siuarsaaneq pillugu Inatsisartut inatsisaat nr. 20, 3. december 2012-meersoq kingusinnerusukkut allannguutitalik.

nipilersornermik inuussutissarsiutit aamma filmiliornermik inuussutissarsiutit inatsisip atuuffianut ilaatinneqarnerat erseqqissarneqarluni.

Siullermeerinninnermi siunnersuummut tapersiilluartoqarpoq.

Tusarniaaneq

Siunnersuut tamanut ammasumik tusarniaassutigineqarsimavoq Namminersorlutik Oqartussat tusarniaasarnermut quppersagaanni piffissami 19. november 2020-imiit 30. december 2020-
imut.

Siunnersuut illup iluani Naalakkersuisoqarfiit akornanni tusarniaassutigineqarsimavoq piffissami 1. december 2020-imiit 5. januar 2021-imut. Tusarniaaneq pillugu ataatsimiititaliaq allanik oqaaseqaatissaqanngilaq.

Ataatsimiititaliap siunnersuummik suliarinninnera

Inatsisip atuuttup atuuffianut “nipilersornermik- aamma filmiliornermik inuussutissarsiutit” ilaatinneqarnerannik erseqqissaateqarneq pineqartoq ataatsimiititaliamit maluginiarneqarpoq. Tamanna inatsimmi atuuttumi atuutereerpoq, tassami nipilersornermik- aamma filmiliornermik inuussutissarsiutit §2, imm. 1 malillugu “misigisassarsiortitsilluni inuussutissarsiornermut” ilaatinneqareermata.

Inuussutissarsiornermut Aatsitassanullu Ataatsimiititaliaasimasup UPA2020/87-imik (UKA2020/87-imik) suliarinninnerminut atatillugu nipilersornermik inuussutissarsiortut inuussutissarsiornermut tapiissutinik pissarsisinnaanerannut killiliissutit periarfissallu suuneri qulaajarnarsimavai. Periarfissat killiliissutillu assingi filmiliornermik inuussutissarsiornermut taamatuttaaq atuutsinneqarput. Inuussutissarsiornermut Aatsitassanullu Ataatsimiititaliap immikkoortoq UPA2020/87-imut isumaliutissiissutaanut innersuussisoqarpoq.

Siunnersuutip aningaasaqarnikkut kingunissai

Siunnersuut pisortanut inuussutissarsiummilluunniit ingerlatsisunut aningaasaqarnikkut allaffissornikkullu kinguneqartussat nalilerneqanngitsoq Naalakkersuisunit ilisimatitsissutigineqarpoq, tassami siunnersuutikkut maannamut periutsumik atorneqartumik allannguisoqarani Inatsisartut inatsisaata atuuffianik erseqqissaateqarneq taamaallaat pineqarmat, taamaalillutik nipilersornermik inuussutissarsiorneq filmiliornermillu inuussutissarsiorneq Inatsisartut inatsisaannut ilaatinneqalerlutik. Ataatsimiititaliaq tamanna pillugu oqaaseqaatissaqanngilaq.

Ataatsimiititaliap inassuteqaatai

Ataatsimiititaliap isumaqatigiittup siunnersuut **akuersissutigineqassasoq** inassutigaa.

Ataatsimiitaliap taama oqaaseqaateqarluni isumaliutissiisummilu allassimanageratut paasinnilluni siunnersuut aappasaaniigassanngortippaa.

Mariane Paviasen
Siulittaasoq

Lars Poulsen
Siulittaasup tullia

Aqqalu Jerimiassen

Karl Tobiassen

Knud Mathiassen

Harald Bianco

Aslak Wilhelm Jensen